


附虎口三關脉症圖



水鏡訣云陰陽運合男女成形已分九竅四肢乃生
 五臟六腑部位各分逆順難明若憑寸口之浮沉必
 乃橫亡於孩子須明虎口辨別三關消詳用藥必無
 差誤未至三歲看虎口三關若脉見風關尚易治交
 氣關則難治交命關爲死症又當辨其色如獸驚三

關必青水驚三關必赤人驚三關必黑若紫色主瀉
痢黃色是雷驚三關脉通度乃極驚之症必死有紋
或青或紅如線直者是母食傷脾左右一樣者是驚
積齊發紋有三條主肺傷風痰或麤澀聲青主傷寒
及嗽紅主泄瀉有黑相兼主下痢紅多白痢黑多赤
痢有紫有兼虎口脉亂乃氣不和也蓋脉紋見有五
色由其病甚色能加變至於純黑者不可得而治矣
响

五臟瘡疹證治

小兒在胎食五臟血穢伏於命門若遇天行時熱或

乳食所傷或驚恐所觸則其毒當出初起之候面燥
腮赤目胞亦赤呵欠頓悶乍涼乍熱咳嗽嚏噴手足
稍冷驚悸多睡宜究其何臟所發察其何因所起令
乳母亦須節飲食慎風寒○五臟各有一症肝臟水
胞色青而小肺臟膿胞色白而大心臟癰色赤而小
脾臟疹小次癰故色赤黃淺也先發膿胞後發疹子
者順先疹子後癰子者順反此爲逆惟腎無候但見
鼈冷耳冷是也若寒水來侮故黑陷而耳鼈反熱爲
逆也急用百祥丸牛李膏各三服不愈者死○如發
潮熱三日以上出不甚多而熱不止者未盡也潮熱

隨出如早食潮熱不已爲水疱之類也一發便出盡者重瘡夾疹者半輕半重也出稀者輕裡外微紅者輕外黑裡赤者微重外白裡黑者大重也瘡端裡黑點如針孔者勢最劇也青乾紫陷昏睡汗出煩燥熱渴腹脹喘喘二便不通者困也有大熱利小便解熱毒若紫黑乾咽或寒戰咬牙或身黃腫紫者急以百祥丸下之復惡寒不已身冷出汗耳聾反熱者死症也此腎氣大旺脾虛不能制故耳下後身熱氣溫飲水者可治以脾土勝腎寒去而溫熱也不黑者不可下下則內虛歸腎大抵瘡疹偶陽在春夏爲順秋冬

爲遊冬月腎旺盛寒病多歸腎變黑又當辨春膿疱
夏黑陷秋癰子冬疹子者十活四五黑者十難救一
○身熱煩滿腹滿而喘便澁面赤悶亂大淋此當利
小便不瘥者宜風散下之若能食而痼頭焦起或未
焦而喘實亦可下之若五七日痼不焦是內熱也宜
風散導之生犀汁解之○癰疹作搐爲脾虛而肝則
乘心火妄動風熱相搏也當用括婁湯瀉心肝補脾
土○瘡黑而忽便膿血并痂皮者乃脾氣實腎邪退
而病安也及瀉而乳食不化者脾虛不能制腎故難
治

薛按痘疹大要與癰疽治法無異宜辨表裏虛實
寒熱蓋表虛而用發表之劑輕則斑爛重則不能
起發而死裡實而用托裡之劑輕則患痘毒重則
喘急腹脹而死裡虛而用疎導之劑輕則難以貫
膿結痂重則不能結靨落靨而死治者可不慎哉
若臂赤發熱疼痛作渴飲冷便秘此形氣病氣俱
實也雖在嚴冬必用四順清涼飲以救其陰若黑
陷不食嘔吐泄瀉寒戰咬牙手足逆冷此脾土虛
敗寒水所侮也雖在盛暑必用六君薑附或十二
味異功散以回其陽此內經捨時從症之法也若

起發遲不紅活不作膿不結痂或發熱作渴飲食
少思此脾胃虛弱也用參芪四聖散以補之若雖
起而色白雖貫膿而不滿雖結痂而不落或痒塌
作渴飲湯腹痛不食嘔吐泄瀉此脾胃虛寒也用
十一味木香散以溫之其在四五日之間死者毒
氣盛真氣虛而不能起發也六七日之間死者元
氣虛而不能貫膿也旬日之外死者邪氣去脾胃
敗而元氣內脫也治者但能決其死而不知其死
必本於血氣虧損苟能逆推其因而豫爲調補豈
斷無生理哉蓋起發貫膿結痂三者皆由脾胃榮

養不可妄投剋伐之劑以致其天枉也至於大人
患此治法迥異昔丹溪嘗治一老人初患痘昏憤
不知亟用大補四十餘劑遂出痘而愈觀此可見
陸親一大王病瘡疹先用抱龍丸解之彼另用藥下
之其疹稠密余曰瘡疹始出未有他症但用平和之
藥解之如三日不出或出而不快宜微發之更不出
當再發之出而不多脉平和無他症者瘡本稀少不
可更發若瘡起發能食者大黃丸下一二行若初起
就用下劑則裡虛瘡不能盡出而稠密難治至三日
其瘡黑陷喜不寒戰遂用百祥丸牛李膏各一服瘡

復紅活而愈蓋黑者歸腎也腎旺勝脾故脾虛寒戰則難治所用百祥丸瀉膀胱之邪自不盛也

五大尉因墜鞦韆患惡驚發搐或用表散之藥不愈此惡驚當先退其熱以大黃丸玉露散惺惺丸加牛黃龍麝解之至三日肌膚尚熱余曰再二日不愈必發癍瘡已而果然用必勝散七日而愈此乃初因誤散其表內熱不止而癍自生也

十大尉瘡疹未出呵欠頓悶驚悸乍涼乍熱手足冷面顯亦咳嗽時噫此五臟症具也以其別無他候故未發出若已出則歸一臟也用抱龍丸數服瘡疹出

而諸症愈

治見枚註痘疹方

丹瘤

丹瘤之症因熱毒客於腠理搏於氣血發於皮膚當以白玉散塗之

薛按前症或命門所稟或風熱相搏或頻浴熱湯或頻着烘衣或傷食發熱或乳母膏粱厚味七情鬱火皆能致者其亦暈遊走者乃血隨風熱也若稟胎毒用化毒丹風熱者敗毒散頻浴烘衣者四物連翹山梔飲食發熱者四君柴胡神麴母食厚味者加味清胃散母有鬱火者加味逍遙散俱加

漏蘆母子俱服白玉散其性大寒能解熱毒若毒發於四肢而輕淺者宜用若延及胸背脇腹者爲重須用活命飲令人用力於各患處遍吮毒血各聚於一處急砭出之若肚腹膨脹二便不通毒入內也用大連翹飲亦有生者

愚治史少叅孫丙申正月陰囊赤腫余作胎毒治之而瘡後患發熱痰熱等症診其母有鬱火血熱用解鬱涼血之藥子母俱服而愈至六月初患吐瀉小便赤澁兩眼瞶動投參朮之類不應或以爲慢驚余視其寅卯關脉赤此屬風熱用柴胡清肝

散加釣藤釣木賊草二劑即愈至丁酉正月頸患
熱毒潰而膿出感風發熱翌日頭面黯腫如斗急
砭出黑血二盞許隨用清熱化毒湯腫退七八翌
日又砭各處血不甚黑仍用前藥去牛蒡子加熟
地黃而愈此症若砭緩則血凝滯或爲破傷風而
死

一小兒患之外勢雖輕內苦便閉此患在臟也服
大連翹飲敷神功散而瘥

一小兒臀患之赤暈走亂令人頻吮使其毒各聚
一處乃砭出黑血塗以加味神功散時以金銀花

甘草節爲末入乳汁調服而愈月餘後兩足赤腫
仍治以前法而痊數日後兩足復赤或用犀角解
毒之類乳食不進肚腹膨脹此復傷脾胃也仍敷
前藥服補中益氣湯加茯苓而痊神功散甚效但
乙丹亦效

一小兒腿患之神思如故乳食如常此毒發於肌
表余謂宜砭泄其毒不必服藥不信外敷寒涼內
服峻厲致腹膨脹乳食不進而歿夫寒涼外傷脾
氣峻劑內傷生氣不死何俟

一小兒兩足常患腫似丹毒而不覺發飲水痰盛

兩頰赤色先兄以爲稟腎經虛火用地黃丸料令
母子俱服而愈

一小兒兩足生瘡疥赤暈如丹久而不愈亦用地
黃丸而痊

一小兒腿如霞遊走不定先以蒜油塗患處砭出
惡血其毒即散更用九味解毒散一劑而安

一小兒因母酒後飲其乳困睡不醒遍身如丹癰
狀余以爲酒毒傳兒爲患令母子俱服葛根解酲
湯而愈

一女子赤暈如霞作瘁發熱此肝經血熱用小柴

胡加生地連翹丹皮而愈凡女子天癸將至婦人月經不調被驚着惱多有此症亦治以前藥

傷風兼變症治二

傷風貪睡口中氣熱呵欠頓悶用大青膏發散之若飲冷不止而善食者用大黃丸微下之餘不可下也○傷風手足冷者脾臟怯也當以益黃散溫脾胃以大青膏散風邪○傷風自利脾臟虛怯也亦用益黃散大青膏未瘥用調中丸有下症用大黃丸後服溫驚丸○傷風腹脹或作喘脾臟虛也當先發散仍補脾○傷風兼肝則發搐頓悶兼心則驚不安兼肺則

喘嗽哽氣兼脾則困睡兼腎則目畏明各隨補其母
○傷風多睡能食引飲吐瀉大便色黃此胃虛熱也
當先用白朮散以生津後用大青膏以發散○傷風
吐沫瀉色青白悶亂不渴哽氣出氣睡而露睛先用
益黃散後用大青膏○傷風或涼或熱多睡氣粗大
便黃白嘔乳不消不時咳嗽先用大青膏後服益黃
散慎不可下○傷風誤用下藥而作渴飲水者此胃
亡津液而虛熱也多用白朮散熱渴自止

薛按大青膏乃表散之劑必外邪蘊結於肺而肺
氣未虧損者方可用之大黃丸乃疎利之劑其食